

CNS2688

U GB 03-07 00183 BA743

aab

MAHATHIR MINTA KAJI TAFSIRAN YANG LEMAHKAN ORANG ISLAM

Mahathir - IKIM

KUALA LUMPUR, 3 Julai (Bernama) -- Datuk Seri Dr Mahathir Mohamad berkata tafsiran-tafsiran berbeza mengenai Islam sehingga mengelirukan serta melemahkan orang Islam perlu dikaji dengan teliti untuk diperbetulkan.

Perdana Menteri berkata, hanya dengan kajian yang jujur dan tindakan berilmiah serta berpandukan kenyataan barulah sesuatu dapat dibuat untuk mengembalikan zaman kegemilangan Islam.

Ketika berucap melancarkan penubuhan Institut Kefahaman Islam Malaysia (IKIM) di Pusat Dagangan Dunia Putra di sini, beliau berkata kajian yang hendak dibuat mestilah ikhlas dan tidak dipengaruhi sentimen atau sikap berat sebelah yang terdapat di kalangan umat Islam sekarang.

+Kenyataan mesti diterima dan khayalan disingkirkan. Tidak ada manfaat yang akan diperolehi dengan mendakwa bahawa walaupun umat Islam sekarang ini kelihatan tidak maju dan lemah tetapi sebenarnya mereka maju dan gagah.

+Demikian juga tidak ada faedahnya mendakwa bahawa walaupun orang lain kelihatan maju dan kuat tetapi mereka sebenarnya mundur dan lemah,+ kata Dr Mahathir dan menambah bahawa penipuan diri tidak ada tempat dalam kajian yang berilmiah. -- Lagi.

▼03/07/11-42MST

CNS2692

U GB 03-07 00182 BA744

aab

Mahathir - IKIM 2 Kuala Lumpur

Sambil berharap IKIM akan memainkan peranan utama membuat kajian mengenai agama Islam, Dr Mahathir berkata para penyelidik dari kalangan ilmuan di institut itu perlu berfikiran terbuka dan berani menyoal pandangan-pandangan yang ortodoks.

+Yang mesti diutamakan ialah kebenaran dan ajaran Islam yang dibawa oleh Nabi Muhammad S.A.W. Ajaran yang ditafsir dan direka oleh mereka yang datang kemudian tidak boleh dianggap sebagai setaraf dengan ajaran Nabi Muhammad S.A.W. dan dengan itu boleh diulas dan diselidik serta digugurkan jika didapati bercanggah dengan al-Quran dan ajaran Nabi Besar kita,+ katanya.

Perdana Menteri berkata usaha itu tidak mudah kerana tentangan hebat akan datang daripada mereka yang benar-benar percaya bahawa apa yang mereka percaya dan yang mereka ajar adalah benar dan tidak boleh disoal.

+Sebarang keraguan terhadap apa yang dipercayai oleh mereka akan dianggap oleh mereka sebagai bertentangan dengan akidah.

+Demikian apabila sesuatu yang baru yang mungkin diasaskan kepada kebenaran sains diutarakan, maka mereka menuduh bahawa ia tidak benar kerana bercanggah dengan apa yang sudah mereka percayai. -- Lagi.

▼03/07/11-57MST

CNS2698

U GB 03-07 00151 BA745

aab

Mahathir - IKIM 3 Kuala Lumpur

+Bahawa dunia ini adalah bulat seperti bola, bahawa langit dan bintang adalah lebih jauh daripada yang mereka anggarkan, bahawa manusia boleh ke bulan, semuanya ditolak dahulu tetapi akhirnya diterima.

+Hanya kerana yang nyata ini diterima tidak menidakkan kebenaran ajaran Islam. Ia hanya menidakkan tafsiran dan pengertian ulama yang terdahulu,+ kata Dr Mahathir.

Menurutnya, dengan peredaran zaman banyak lagi perubahan pendapat mesti dilakukan manakala tafsiran-tafsiran yang lama mungkin didapati tidak lagi sesuai dengan kenyataan.

Katanya, banyak lagi perkara dan kebolehan yang sekarang dianggap ajaib dan mustahil akan menjadi kenyataan umum dan biasa.

+Tetapi agama Islam terus relevan dan tepat. Yang salah bukannya agama tetapi pentafsir agama,+ katanya.

Beliau berkata institut itu tidak harus bimbang menghadapi tentangan dalam menyelidik mereka demi mencari kebenaran bagi memajukan agama, umat dan negara Islam. -- Lagi.

▼03/07/12-06MST

CNS2751

U GB 03-07 00151 BA749

bah

Mahathir - IKIM 4 Kuala Lumpur

+Jika Islam pada satu masa dahulu dapat membawa tamadun yang gemilang, apakah Islam pada hari ini tidak mungkin mewujudkan sekali lagi satu tamadun yang sama kegemilangannya?+ tanya Dr Mahathir.

Katanya, mereka yang berfikiran waras tentu yakin bahawa perkara itu bukan sesuatu yang mustahil walaupun pencapaiannya tidak mudah.

+Sudah tentu ia akan mengambil masa tetapi sesuatu matlamat itu tidak akan tercapai tanpa permulaan. Segala-galanya bermula dengan langkah pertama,+ katanya.

Katanya, institut itu juga bertujuan mengatasi kekeliruan yang banyak terdapat di kalangan orang Islam dan bukan Islam mengenai agama Islam sehingga berlaku salah faham dan sengketa bukan sahaja antara orang Islam dan bukan Islam tetapi juga antara sesama Islam.

Sempena pelancaran IKIM itu, Dr Mahathir juga merasmikan Kongres +Menjelang Abad 21: Islam dan Wawasan 2020+ anjuran bersama kerajaan dan institut itu. -- Lagi.

▼03/07/13-00MST

CNS2756

U GB 03-07 00155 BA750

bah

Mahathir - IKIM 5 (Akhir) Kuala Lumpur

Dr Mahathir berkata negara dan umat Islam perlu membuat persediaan untuk abad ke-21 dan menegaskan bahawa matlamat menjadikan Malaysia sebuah negara maju menjelang tahun 2020 bukan bermakna mengetepikan akhirat.

+Malangnya ada pihak yang kononnya memberi penekanan kepada wawasan akhirat. Sebenarnya Kerajaan dan masyarakat Islam tidak pernah mengetepikan akhirat. Tetapi akhirat mesti diimbangi dengan dunia,+ kata Perdana Menteri.

Ketua Setiausaha Negara Tan Sri Ahmad Sarji Abdul Hamid selaku Pengerusi IKIM dan Pengerusi kongres berkata IKIM merupakan +tangki pemikiran+ yang ditubuhkan kerajaan untuk meningkatkan kefahaman masyarakat Malaysia terhadap ajaran dan nilai Islam serta hubungannya dengan kehidupan.

Kongres itu pula bertujuan memberikan kefahaman mendalam mengenai Wawasan 2020 dari pandangan Islam dan hubungannya dengan pembangunan bangsa Malaysia yang bersatu, pembangunan ekonomi, sains dan teknologi.

Seramai 250 orang termasuk 40 bukan Islam menghadiri kongres dua hari itu. -- Bernama.

▼03/07/13-03MST